

清代筆記叢刊

兩般秋雨盦隨筆

梁紹壬著

二

卷之四

四

兩般秋雨盦隨筆卷三目錄

黃孝子

屈戌

趙南星硯

李西齋

祭文

池塘生春草

勝朝奢靡

紈袴

詩傍門戶

在璞堂老人

京師梨園

銀杯

理學偏僻

青躬道人

仔

碧城仙館詩

頻羅庵主

作詩取法

枕代頭

張詡庵

懲矯

痘疹

侮聖非賢

荆釵記祭文

青芙蓉閣詩

丞相衙衙

漱玉斷腸詞

背蘇州

拍曲几

蜜薔薇

補子

病詩輓聯

荔支

端午

顧受笙

南梁北孔

盧溝橋

陳眉公

墨派濫調

詩求新異

崔紅葉

老先生

五官並用

閨秀

謝道韞

柳如是

黃子未

蕉葉

絕唱

乩示闡題

洋錢

恥認祖宗

詆毀東坡

海忠介

老少同榜

黃石齋斷碑記

集虛

酒樹糖樹

瓶水齋詩

梧桐

子同生

閨秀詩

詠諧本色

宋玉

小救駕

蘇芷香

十些

葛秋生

致趙秋舲書

祈夢

麻蛋燒豬

鈔法

哲那環

字音假借

象牙

釣臺詩

絕人太甚

割裂題

詩學太白

荆軻詩

異物

武成

青州從事

物性

武人口吻

巖牆

駟

諸葛錫

龜魚佩

威德入人心

曲詞取士

紙月

虛字入詩

胡旦

詩用俗稱呼

疊句單傳

享國之久

晝寢

校人

下官

辨名非字

易安詞

闕門踰閭

汗青殺青

小縣少古蹟

急語成話柄

短小人詞

名姓在五十筆外

毒藥庫

兩般秋雨盦隨筆卷三

錢唐梁紹士應來甫纂

黃孝子

仁和黃小松司馬易尊人松石處士樹穀孝子也父歿於保定處士走數千里函骨以歸沙石穿麻鞋血痕縷縷有負骸圖詩云負骸孤走保陽城日日愁霖淚雨傾只有父魂兒命在夜來同宿畫同行其先人官少參者人呼黃佛兒處士詩云為展松楸到梵村墓門華表百年存白頭老嫗遙相指黃佛兒家七世孫處士工鐵筆小松司馬繼其學

屈戌

窗門之鈎舊名屈戌程十然丈曰戌字當作戌字戌有守義屈戌者屈鐵以為守也趙秋舲同年云尤西堂詞中曾以戌字押入遇韻則訓戌為戌前人已言之矣

趙南星硯

余幼時曾見有人持一硯來上鐫趙忠毅公款識有銘云東方未明太白睽睽雞三號更五點此時拜疏揭太閤事成銘汝功不成同汝貶當時草劾璫疏蓋用此硯也

李西齋

李西齋名堂字允升錢唐布衣為詞酷摹白石著有梅邊笛譜二卷蓬窗翦燭集二卷久已
膾炙人口矣詩不常作然閒亦一吟晚年貧無立錫逃於麴蘖道光辛卯以病歿汪小米中
翰彙其所作冬榮草堂詩序而刊之五言如秋日園居雜興云苔涼無鳥下水淨見魚行胡
眉峰朱閣泉徐西澗登吳山大觀臺遠眺云雲陰含雨過江氣逼人清北郭晚眺云客驚秋
信早老受夕陽遲曉過南湖云岸轉入高柳湖寬無近峯七言如寒食前四日湖上看桃花
云柳綠烟岸綠沈樹花擁春山紅過湖懷湯典三客白下云綠漲鴨頭三月浪青橫驢背六
朝山呈吳穀人祭酒云廿年宦橐新詩本一領朝衫舊酒痕渡鄱陽湖云幾帆出沒樹中樹
沙岸界畫湖外湖張文獻公祠云手錄方呈金鏡去容華已選玉環來皆清麗可誦王蘭泉
司寇祖嘗題其詩云吳下沙維杓張岡蹟已陳蘭坻方薰石瓢翁春亦前塵西冷又見西齋
出始信風騷在逸民其為前輩推許如此

祭文

祭文之簡古者宋李觀祭歐陽太夫人文云孟軻亞聖母之教也夫人有子如軻雖死何憾
尚饗陸放翁祭朱文公文云某有捐百身起九原之心傾長河注東海之淚路修齒髦神往
形留公沒不忘庶其歆饗趙介如祭賈似道文云嗚乎履齋死循死於宗申吳潛先生死閩

死於虎臣。哀哉尚饗。明武宗祭新閣老文云。朕在東宮。先生為傅。朕登大寶。先生為輔。朕今渡江。聞先生訃。哀哉尚饗。此數篇。記十五歲時。隨長輩葛嶺掃墓。先伯祖諫庵公。在湖舫述示。且訓之曰。聞汝師述汝作文。動輒千言。少年舉筆。固以充沛為主。然不可不知凝鍊之法。偶舉數則。可以隅反。今追思往訓。而敬述之如此。

池塘生春草

謝康樂池塘生春草。園柳變鳴禽之句。自謂語有神助。李元膺則曰。余反覆觀此句。未見有過人處。而譽之盛者。則又以為妙處不可言傳。其實皆門外語也。案陶弇集云。此句之根。在四句以前。其云卧疴對空牀。衾枕昧節候。乃其根也。寧幃暫窺明。下歷言所見之景。至池塘生春草。知卧病前所未見者。而時節流換可知矣。此評自是確論。若吟窗雜錄謂靈運因此詩得罪。遂託以阿連夢中授之。權文公評之云。池塘者。泉州瀦溉之地。今日生春草。是王澤竭也。幽風所紀。一蟲鳴則一候變。今日變鳴禽。是候將改也。夫鍛鍊周內。以入人罪。亦復何所不可。若以之論詩。則入魔道矣。

勝朝奢靡

嚴分宜父子擅權。賄賂充斥。然考天水冰山錄所載。籍沒之數。僅黃金三萬兩。白銀二百餘

萬兩而已。考劉瑾之籍也。銀七千萬兩。朱綜之籍也。銀五千萬兩。魏忠賢之籍也。銀三千萬兩。並見徐樹丕識小錄。則閹寺之貪婪。更百倍於宰執。累朝剝削。未造之貧。兆於此矣。恭讀聖祖仁皇帝上諭。言明崇禎時。後宮花粉之資。每歲開支至七百餘萬兩。則其他之奢靡可知矣。思陵崇尚節儉。而積習相沿。猶復如此。國家安得不民窮財盡耶。

紉袴

晉帝見歉歲。民飢。謂左右曰。何不食肉糜。遼主見道上餓夫。謂左右曰。何不食乾腊。千古庸闇。如出一轍。宋蔡京諸孫生長膏粱。不知稼穡。一日京戲問之曰。汝曹日啖米。試問米從何出。一人曰。從臼子裏出。京大笑。又一人曰。不然。我見從席子裏出。蓋京師運米。以席囊盛之。故也。紉袴不辨菽麥。往往如此。

詩傍門戶

吳脩齡圍鑪詩話云。今人作詩。動稱盛唐。曾在蘇州見一家舉殯。其銘旌云。皇明少師文淵閣大學士申公間壁豆腐店王阿奶之靈柩。可以移贈諸公。此雖虐謔。然依人門戶者。可以戒矣。

在璞堂老人

仁和方正齋夫人芳佩。勤僖公汪為坡中丞。新之繼室也。工詩文。有知人鑒。乃翁相攸時。攜文二首。一為吳頡雲修撰。其一則芍坡中丞也。展轉不能決。以示夫人。時吳方諸生。汪猶布衣也。夫人閱吳作曰。是當早發。然英華太露。誠恐不壽。閱汪作曰。此大器也。然須晚成。翁遂舍吳而議汪。後吳果大魁。官位不顯。且未享遐齡。汪則數歷中外。階至一品夫人。生一子二女。富貴壽考。今則孫階之蘭玉森森矣。余為夫人之再從彌甥。幼時得侍謦欬。言論揮霍。旁若無人。晚年尤喜作擘窠大字。筆力出入襄陽。一洗脂粉氣象。嘉慶丁卯。山舟學士重宴鹿鳴賦詩四章。和者不下百餘人。夫人時年八十。和詩三章。評者以為諸人皆勿能及。夫人享年八十二歲。有在璞堂稿行世。夫人媳王氏名德宜。松江人。亦工詩。侍夫人日。屢有唱和。夫人既歿。家政一委之姬妾。日則彈琴詠詩。焚香禮佛而已。著語鳳巢詩稿。記其金陵詩二句云。嘯鳥猶呼奈何帝。今人尚說莫愁湖。跌宕之致。可以想見矣。

京師梨園

京師梨園四大名班曰四喜。三慶。春臺。和春。其次之則曰重慶。曰金鈺。曰嵩祝。余壬午年初至京。當過密八音之際。未得耳聆目賞。次年春始獲縱觀色藝之精。爭妍奪媚。然余逢場竿木。未能一一搜奇也。丙戌入都。寓近彼處。閒居無事。時復觀之。四班名噪已久。選才自是出

人頭地即三班中亦各有傑出之人。擅場之技未可以檜下目之。此外尚有集芳一部。專唱崑曲。以笙璈初集。未及排入各園。其他京腔弋腔西腔秦腔音節既異。裝束迥殊。無足取焉。表弟蘇蔚生雅有今樂之好。取自四喜以下七班某日至某園。一月之中。周而復始。譜為小錄一編。界以烏絲之闌。裝以紅錦之裏。題其簽曰燕臺樂部。為日下梨園錄。而屬余為之序。云首善繁華之地。太平歌舞之時。幾處旗亭。能謳水調。誰家簫鼓。不按涼州。既紙醉以金迷。復花交而錦錯。樓臺十二。一時捲上珠簾。裙履三千。幾箇偷來鐵笛。固已猜疑長樂。彷彿廣寒矣。爰有家居浙水人。號斜川。愛當定子之筵。屢顧周郎之曲。衫裳倜儻。襟袖溫存。每當燈酒良宵。春秋佳日。今雨舊雨。無花有花。未嘗不高倚闌干。俯臨珠玉。評量粉黛。環肥燕秀之間。品藻冠裳。賈佞江忠之列。紅牙拍去。青眼搜來。莫不采菲無遺。存花有紫。爰集都下名班。曰四喜三慶春臺和春重慶金鈺嵩祝分隸七部。合彙一編。排如春水魚鱗。準遞年年之信。序似秋風雁翅。不愆月月之期。其間粉墨登場。丹青變相。銅琶鐵板。大江東高調凌雲。翠繞珠圍。小海唱低歌醉月。選聲選色。取貌取神。宜喜宜嗔。可歌可泣。於是按圖集錦。照譜徵花。看來欲徧長安。佳處爭傳日下。羣仙簇綵。大羅自有因緣。一佛拈花。下界都來供養。亦足徧邀袍澤。同聽霓裳也已。其他舞綵之行。尚有集芳之部。然而此曲只應天上。序班未徧人。

間不隸梨園。難歸菊部。愛已同於割玉。情匪類於遺珠。至若趙北新音。秦西變調。仰天撫缶。但唱嗚嗚。市地繁絃。惟聞艾艾。已同檜下。概比鄭聲。凡此旁搜。俱不贅列。顧或者恨擷芳玉。籍未識雛鶯乳燕之名。采豔金臺。不書董袖鄂香之事。豈知酒闌燈燂。茶熟香溫。但陳玉筍之新編。不類燕蘭之小譜。然而三年宋玉。好色雖異於登徒。十五王昌。薄倖迥殊乎崔灝。使僅闌凭儂袖。亦知眼過烟雲。倘教釵挂臣冠。未必心同木石。而茲者寄情絲竹。用佐琴樽。聊寄娛耳之資。不敘銷魂之事云爾。

銀杯

孫雨人學博同元家藏宮寮雅集酒器。以白金作盃。如梅花形。重二十八兩有奇。外界烏絲。內鐫諸公姓氏名號。爵里於底。以量之大小分屬焉。首湯潛庵。河南睢州人。次沈繹堂。荃江南華亭人。次郭快圃。直隸清苑人。次王昊廬。澤宏湖北黃岡人。次耿逸庵。河南登封人。次田子湄。喜霽山西代州人。次張敦復。英安徽桐城人。次李山公。錄予順天大興人。次朱即山。阜浙江山陰人。次王阮亭。士稹山東新城人。共計十事。

理學偏僻

王荊公以春秋為斷爛朝報。不列六經。程伊川以資治通鑑為玩物喪志。禁人勿習。講理學。

者偏僻。往往如此。

青躬道人

仁和王健庵先生。隨園老人之甥也。家貧。以諸生老。能詩。格不求高。而專事精潔。偶成云。蘿添老樹衰時葉。雲補青山缺處峰。自遣云。妻兼婢事休嫌嬾。女比兒柔不厭多。詠鼠云。怪它兩眼小於漆。長看世人夢未醒。頗得元人風味。晚年自號青躬道人。或問其故。曰。無米無穴。精窮而已。其風趣如此。

仔

粵俗呼泥腿曰濫仔。呼幼穉曰小仔。呼幼女曰柳陰仔。呼使女曰美仔。呼十歲內男女曰頗門仔。呼紈袴曰阿官仔。案仔即魚字。音宰。水經注云。鸞童卅女。弱年崽子。是其所本。至北人則以為罵詈之詞。與羔子。蹠子等矣。

碧城仙館詩

陳雲伯大令碧城仙館詩。是其少作。皆香奩側豔之詞。後刻頤道堂全集。大半刪去。猶記其無題二句云。七十死。央同命鳥。一雙蝴蝶。可憐蟲。余幼時酷愛誦之。

頻羅庵主

釋氏呼木瓜曰頻羅。吾家堂前有一株。蓋前代樹也。山舟學士。因自號頻羅庵主。公性淡榮利。且自以鯁介。不諧於俗。丁艱後。遂引疾不出。乾隆二十五年。○孝聖憲皇后八旬萬壽。公入都祝。○釐迎駕次。○上顧見曰。汝來乎。公奏言。臣足疾未痊。祝。○聖母萬壽後。即回籍。時太僕陳句山先生與公同列。退而說謂公曰。頃。○上方嚮用。何自退若是。公曰。實有足疾。何敢欺也。時陳以。○恩重。不得乞身。故送公之行。有句云。莫怪老羸慵折柳。對君慙汗出如漿。紀實也。五十五年。祝。○高廟八旬萬壽。有勸公必謁時相者。公毅然不顧。即日出都。家居賦答友二首云。卅年蒲柳早衰蕪。壯不如人況老乎。苦筍硬差良有願。葫蘆依樣已難摹。休言報。○國文章在。只合投閒草木俱。物不答施天地大。受生慚負是頑軀。北望。○君門首重回。一門三世荷。○栽培。臣心不似菰施草。天意須憐擁燿材。絮已沾泥飛不起。豆和灰冷爆難開。他生願作銜環雀。再上觚棱高處來。公平居儉於自奉。一冠數十年不易。生平不好內。不喜飲宴。故隨園老人贈詩。有一飯於嚴常選客。半生孤冷不宜花之句。不為人祝壽。壬子七十誕辰。設凶具於門以謝客。故自述詩有云。老夫自祝飛光酒。一具桐棺萬楮錢。道其實也。嘉慶十六年冬。公患髮疽。危篤中。見有人持楹帖入。其句云。萬里烟雲開瘴戶。一天風雨護神鑪。病遂愈。因自號新吾長翁。九十誕辰。張岐山問萊壽聯云。人近百年猶赤子。天留二老

看元孫人賞其工。公配汪恭人。長公一歲。先公二年卒。公輓聯云。一百年彈指光陰。天胡靳此九十載齊眉夫婦。我獨何堪。公以嘉慶乙亥七月十五日卒。年九十三。歿前數日。手書訃稿。遺命不治喪。不刻行狀。同里衆紳士輓聯云。朶殿奉絲綸。四百紙述事記言。史館猶傳大手筆。明湖思俎豆。九十載清風碩德。邦人長想古衣冠。大吏以公品望。於式士民。題請從祀鄉賢。得旨俞允。入祠之日。傾城會送。前此無其盛也。

作詩取法

駕部許周生先生嘗語余云。孔子曰。溫柔敦厚。詩之教也。近人作詩。溫柔者多。敦厚者少。至哉斯言。又聞之先輩云。凡押啞韻而能響者。其人必貴。押險韻而能穩者。其人必夷。亦是名論。

枕代頭

明熊經略廷弼既逮入獄。其卧處有一藤枕。每晚人靜禮北斗。則取此枕焚香供焉。已而刑有日。神色不變。就刃時。奉傳首九邊之旨。西曹郎俄錄其首。則空無所有。惟見一藤枕大駭。相戒勿洩。亟報魏閣。大索不得。遂秘其事。而九邊所傳之首。實非經略真顱也。此事甚新。見始甯陳氏秋曹日錄。

張訥庵

張訥庵。又姓韓。甘肅人。狀貌修偉。膂力絕人。遨遊江浙間。每來西湖。則必寓余家之葛林園。一肩行李。無僮從。善飲啖。斗酒彘肩。未嘗告飽。蔬菜脫粟。未嘗苦飢。所識多兩江知名士。與之談述。宋元明季事甚悉。至本朝掌故。則某年奉某。上諭行某事。某官治某省。益某政。元元本本。纖鉅靡遺。尤好談兵。酒酣以往。言平岳西征事。鬚眉俱躍躍也。一日忽來別曰。家有老母。年逾九十。書來趣歸。行有日矣。問何不早歸。曰。實不相隱。某少年亡命。浪迹江湖。今時移勢易。仇家物化。無批根者。願及未填溝壑。至父母邦。而首邱焉。遂徧別所知而去。去年已七十餘。今不知尚存否也。

懲矯

雍正間。學使某公。以清厲自矜。一日有業師來求飲助。以清貧辭。師勸之。某公具以入告。上惡之。傳旨申飭。命藩庫扣學政養廉銀五百兩。與其師。天下快之。

痘疹

痘疹。李時珍以為始於馬伏波征武溪蠻。染此疾歸。名曰虜瘡。不名痘也。文苑英華。莆田黃滔陳先生集序云。陳黯幼能詩。十三袖詩一通。見清源牧。時面痘新愈。牧戲之曰。藻才而花。

貌胡不詠之。黯應聲曰。玳瑁應難配。斑犀定不加。天憐未端整。滿面與裝花。此尚詠豆痂。非面麻也。舊有新婚詞云。高捲珠簾明點燭。請教菩薩看麻胡。近又有人句云。不是君容生得好。老天何故亂加圈。則竟詠面麻矣。

侮聖非賢

王莽處處比周公。王安石事事學周禮。王莽曰。天生德於予。漢兵其如予何。王安石曰。天生黑於子。澡豆其如予何。可憐周公孔子。千古為兩箇姓王人。蔣惱。又宋淳熙中。監察御史陳賈奏理學欺世盜名。乞加擯斥。太學諸生為之語云。周公大聖猶遭謗。伊洛名賢亦被譏。堪笑古今兩陳賈。如何專把聖賢非。從來怪事。無獨有偶如此。

荆釵記祭文

荆釵記傳奇。王十朋祭江其祭文云。巫山一朵雲。閬苑一團雪。桃源一枝花。瑤臺一輪月。妻阿。如今是雲散雪消。花殘月缺。按此詞亦有所本。孫季昭示兒編云。北朝來祭皇太后文。楊大年捧讀空紙無一字。因自撰云。惟靈巫山一朵雲。閬苑一堆雪。桃園一枝花。瑤臺一輪月。豈期雲散雪消。花殘月缺。時仁宗深喜其敏速。案此詞浮豔輕佻。施之君后。失體已甚。烏可為訓。錢竹汀宮詹云。大年死於天禧四年。其時仁宗未即位也。章獻之崩。大年死已久矣。則

其為委巷不經之談無疑

青芙蓉閣

桐鄉陸杉石太守元鑑所著也。詠史之作最擅長。弔史閣部云。父老尚思宗大尹。江山空恨孔都官。弔蔡中郎云。幽囚未肯寬司馬。直筆何堪失董狐。邯鄲道中云。間道何年歸白璧。游仙有客夢黃梁。詠汾陽王云。世望中興無此速。天私奇福到公全。長安懷古云。一代亂源方鎮表。千秋法鑒寺人詩。詠狄梁公云。淫鬼千年求食少。公門一代得人多。馬伏波祠云。粵國戰功橫海大。漢廷家法寡恩多。宏詞肅括皆卓然。可傳之句也。

丞相衙

京師繩匠胡同。又名丞相胡同。嚴分宜之賜第在焉。毗連半截胡同。中有一宅。舊為海昌查小山所居。今歸吾鄉大銀臺姚公亮府。祖同宅內聽雨樓者。東樓賞鑒書畫處也。曲檻長廊。宏梁巨礎。規模軒敞。罕有其倫。堂之東隅。地有巨窖。甃以青磚。局以石戶。嚴關鐵牡。啟之深邃不可測。蓋當日藏弄珍異之所也。或曰。其時京攸秉軸。賄賂充斥。有暮夜黃緣者。往往於地中納約。理或然歟。

漱玉斷腸詞